

e deven aver los omes fijosalgo, nin ge las fagades guardar, donde adelante finquen para sienpre jamas pecheros. E los unos e los otros non fagades ende al, so pena de la nuestra merçed e de diez mill maravedis desta moneda usual a cada uno de vos para la nuestra camara. E de commo esta nuestra carta vos fuere mostrada, o el treslado della signado commo dicho es, e los unos e los otros la cunplieredes, mandamos, so la dicha pena, a qualquier escrivano publico que para esto fuere llamado, que de ende al que vos la mostrare testimonio signado con su signo porque nos sepamos en commo conplides nuestro mandado.

Dada en la Morxuera, çerca de Lisboa, veynte dias de mayo en el año del nasçimiento del nuestro salvador Jhesuchristo de mill e treçientos e ochenta e quatro años. Yo, Joan Ferrandez la fiz escrivir por mandado del rey.

(147)

**1384-V-29. Cerco sobre Lisboa.— Carta de Juan I pidiendo servicio de ballesteros y lanceros para la guerra de Portugal. (A.M.M., C.R. 1384-91, Fol. 105, r.)**

Don Johan, por la graçia de Dios, rey de Castiella, de Leon, de Portugal, de Toledo, de Gallizia, de Sevilla, de Cordova, de Murçia, de Jahen, e del Algarbe, de Algezira, e señor de Lara, e de Vizcaya e de Molina, a todos los conçeios, alcalles, omes buenos e otros ofiçiales qualesquier del obispado de Cartajena con el regno de Murçia, e a qualquier o a qualesquier de vos a quien esta nuestra carta fuere mostrada, o el treslado della signado de escrivano publico, salud e graçia. Bien sabedes en commo nos estamos en los nuestros regnos de Portugal, e sabed que algunas personas e conçeios de los dichos nuestros regnos que non nos quieren obedecer en aquella manera que cunple a nuestro serviçio, por lo qual nos avemos acordado de les fazer el mayor daño e mal que ser pueda, fasta que vengan a nuestro mandamiento en la manera que cunple a nuestro serviçio, por lo qual nos avemos acordado de los fazer el mayor daño e mas que ser pueda.

E para esto avemos menester pieça de omes vallesteros e lançeros, de los quales mandamos fazer repartimiento por algunas çibdades, e villas e lugares de los nuestros regnos de Castiella. En el qual repartimiento copo a vos, los dichos conçeios del dicho obispado de Cartajena con el regno de Murçia, los vallesteros e lançeros que aqui dira en esta guisa: vos, el conçeio de la çibdat de Murçia con torres e pastores, veynte e quatro lançeros e veynte e seys vallesteros; e vos, el conçeio de Havaniella, ocho lançeros e quatro vallesteros; e vos, el conçeio de Ricote con su valle, e Çebtyn, e Lorquin, e Archena, e el Alcantari-



lla, e el Alguazas del Obispo, diez e seys lançeros e ocho vallesteros; e vos, el conçeio de Çieça, quatro lançeros; e vos, el conçeio del Alguaza, quatro lançeros; e vos, el conçeio de Mula e de Libriella, tres lançeros; e vos, el conçeio de Canpos e Albudeyte, tres lançeros; e vos, el conçeio de Chinchiella, diez e siete lançeros e siete vallesteros; e vos, el conçeio de Alvaçete, seys lançeros e tres vallesteros; e vos, el conçeio de Hellyn, quatro lançeros; e vos, el conçeio de Xorquera, quatro lançeros e /dos?/ vallesteros; e vos el conçeio de Tovarra, tres lançeros; e vos, el conçeio de Yecla, quatro lançeros; e vos, el conçeio e /Almansa/, quatro lançeros; e vos, el conçeio de Alcalá, dos lançeros; e vos el conçeio de Veas, un lançero.

Porque vos mandamos que luego en punto, vista esta nuestra carta, o el treslado della signado commo dicho es, vos ayudes e repartiedes los dichos vallesteros entre vosotros, que sean buenos mançebos e tales que cunplan a nuestro serviçio, en manera que.....fasta çinco dias primeros siguientes, e se vengán para nos a Lixbona, o doquier que nos fuéramos. E si por aventura vos, los dichos conçeios o algunos de vos, nos devedes a dar algunos maravedis de las quatro monedas postrimeras de las seys monedas que nos mandamos coger este año en que somos de la data desta carta, que paguedes sueldo de dos meses a los dichos omes, a razon de quatro maravedis cada dia al vallestero armado, e al vallestero desarmado e a los lançeros a razon de tres maravedis cada dia cada uno e pan con que partan dende; e sy non devieredes algunos maravedis de las dichas quatro monedas, enbiad a Johan Alfonso del Castiello, nuestro recabrador mayor en el dicho obispado con el dicho regno, e el vos pagara sueldo de dos meses para los dichos vallesteros e lançeros a los dichos presçios, e tanto que aca sean connusco /nos/ les mandaremos pagar sueldo por el tiempo que servieren. E guisad de lo fazer en tal manera que, si serviçio e plazer nos avedes de fazer, commo vos enbiedes los dichos vallesteros e lançeros, e los vallesteros armados de fojas e los lançeros de buenas cotas e baçinete; otrosi, que los dichos lançeros que traygan cada uno dellos un escudo e una lança e una hacha para talar. E es menester que en esto non pongades escusa nin tardança alguna, ca asi cunple a nuestro serviçio, e que lo fagades luego segund el mester en que estamos; e guisad por tal manera como vos los.....non çesedes fasta que vos enbiedes los dichos omes.

E los unos e los otros non gadades al, /so pena de la nuestra/ merçed, ca bien vedes quanto cunple a nuestro serviçio e commo lo devedes fazer, segund el mester en que estamos.

Dada en la nuestra çerca de sobre Lixbona, veynte e nueve dias de mayo, año del nasçimiento del nuestro salvador Jhesuchristo de mill e trezientos e ochenta e quatro años.

Yo, Alfonso Gomez, la fize escrivir por mandado del rey.

